



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

***Komunikadu Imprensa***  
***Tribunál Distritál Dili***  
**13 Abril 2015**

**Tribunál Distritál Dili kondena pena prizaun tinan 20 ba arguidu krime violasaun seksuál  
ba menór**

Iha 08 Abril 2015, Tribunál Distritál Dili kondena arguidu ABdH ho pena prizaun tinan 20 no selu indemnizasaun US\$2,000,00 tanba provadu komete krime abuzu seksuál ba menór hasoru lezada ne'ebé sei tinan 6. Kazu ne'e akontese iha 30 Setembru 2014.

Tribunál prova katak lezada no nia avo feto ba konsulta iha klínika. Wainhira lezada ba soe be, arguidu bolu lezada no ho obrigatóriu kous lezada lori ba iha uma ki'ik ida no komete violasaun seksuál hasoru lezada.

Lezada sofre kanek iha nia orgaun seksuál, suku puntu haat no baixa durante loron 3 iha ospital. Hahalok arguidu prenxe rekeztus krime ne'ebé preve iha artigu 177(1) Kódigu Penál kona-ba abuzu seksuál ba menór.

Durante julgamentu arguidu nega faktu hotu hosi akuzasaun ministériu públiku nian. Maske nune'e, lezada kontinua reforsa faktu sira iha akuzasaun no prova dokumental sira hanesan relatóriu médiku hosi ospital.

Bazeia ba provas hirak ne'e tribunál kondena arguidu ho pena prizaun tinan 20 no selu indemnizasaun US\$2,000 ba lezada.

“Krime hasoru labarik nu'udar krime grave tebes no akontese iha área hotu iha Timor-Leste, tanba ne'e JSMP espera katak desizaun ida ne'e bele sai referensia ba comunidade atu evita krime abuzu seksuál hasoru labarik iha futuru,” dehan Diretor Ezekutivu JSMP, Luis de Oliveira Sampaio.

JSMP apresia desizaun ida ne'e atu kondena arguidu ho pena masimu no selu indemnizasaun ba lezada, tanba pena ne'e bele rekoñese sofrimentu ba lezada. Maibe, JSMP observa katak mesmu kondensasaun ba krime sira involve menór aas, maibé krime ne'e kontinua akontese.

Tanba ne'e estadu iha dever atu proteze labarik sira liuhosi kondensasaun todan hosi tribunál sira no involvimentu hosi entidade hotu liu-liu família atu servisu hamutuk proteze labarik sira nu'udar futuru nasaun nian.

JSMP mós enkoraza tribunál sira hotu atu utiliza medida ne'ebé sensível ba labarik sira nia nesiedade espesial iha julgamentu prosesu nia laran, por ezemplu uza deklarasaun ida hosi

lezada atu evita trauma ne'ebé kauza hosi pergunta repetitivu, no asegura labarik nia privasidade no seguransa.

Atu haree JSMP nia rekomendasaun sira kona-ba ne'e bele haree JSMP nia relatóriu ho titulu "Labarik sira-nia asesu ba justisa formal iha Timor Leste" iha [www.jsmp.tl](http://www.jsmp.tl) iha parte Relatóriu Temátiku nian.

Julgamentu ba leitura akordaun ne'e representa hosi Juis, Dra. Jumiati Maria Freitas, ministériu públiku representa hosi Dra. Lidia Soares no arguidu hetan defeza hosi Dr. Marçal Mascarenhas.

Atu hetan informasaun liutan favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Telefone: 3323883 | 77295795